

uent dans la bonne conduite, & celuy qui conduit mal est souuent mal fuiui. Car la fidelle obeissance des sujets despend de la suffisance de bien commander du bon Prince, disoit Theopompus Roy de Sparte.

Pendant que nous estions là, le temps d'aller en guerre contre les Hiroquois estant arriué un ieune homme de Sainct Ioseph, desireux d'honneur & de reputation, voulut luy seul en faire le festin, & defrayer pour un iour entier, tous ses compagnons, ce qui luy fut de grand coust & despence, aussi en fut-il grandement estimé : car ce festin estoit de six grandes chaudieres pleine * de bled d'Inde concassé, avec quantité de grands poissons boucanez, sans les farines, & les huiles pour faire la fauce.

On mit les chaudieres sur le feu dés auant iour, dans l'une des plus grandes cabanes du bourg, puis le Conseil estant acheué, & les resolutions de guerre prises, tous entrerent au festin, pendant lequel, ils firent les uns apres les autres, les mesmes exercices militaires, qu'ils ont accoustumé aux festins de guerre. Les chaudieres nettes, & les complimens & remerciemens rendus, partirent pour le rendez-vous de toute l'armée assigné sur la frontiere, d'où ils se rendirent sur les terres ennemies, auxquelles ils prindrent enuiron soixante prisonniers, la pluspart desquels furent tuez sur les lieux, & les autres amenez pour faire mourir aux Hurons par le feu, puis mangez en leur assemblée, sinon quelque * membres qui furent distribuez à des particuliers pour leurs malades. 443

Leurs guerres ne sont proprement que des surprises & deceptions plus tost que des batailles & combats ou